

## COMU PASSU LI JURNATI

Accuffulatu ccà darrè st'arcova  
mi chiangu dda saluti chi paliava,  
quannu ch'à pugna chiantava li chiova,  
e poi senza tinagghia li scippava;  
e quannu tanti voti retti prova  
cu li me' renti cuti rusicava,  
e pi pritisa na pignata nova,  
cu gran tistatuna la sfunnava.

Ora nun l'haju chiù dda forza antica,  
chi cu na manu sprimia na giaca,  
sugnu comu na fella quannu spica,  
cu' n'ammuttuni nterra si sdivaca;  
du pani cercu sulu la muddica,  
nun vivu vinu pirchè mi 'mmriaca,  
però caminu ancora binirica  
cu la velocità di na lumaca.

## ARMUZZA TURMINTATA

Vita d'affanni, di peni, di stenti,  
munnazzu vili, 'nfami e vagabunnu,  
staju pirdennu li me' sentimenti  
sfamari ottu figghi mi cunfunnu;  
fazzu tanti prugetti tempu un nenti  
ma poi caru, non chiantu prufunnu;  
e cu' canusci li me' patimenti,  
di fangu in oru descrivi lu munnu.

Purria turnari la tranquillità  
na st'armuzza ridutta 'ndicadenza,  
si lu dicoru, la muralità  
si metti natra vota in efficienza,  
quannu chi nternu di l'umanità  
criscissi dignità, cori e cuscenza;  
però c'è 'nmezzu la difficoltà:  
d'unne' chi la va' trovu sta simenza?

Gintilissimi litturi  
nun m'haviti a cinsurari  
sta simenza pi favuri  
fatimilla capitari  
a cu' è chi mi procura  
sta simenza assai eccellenti  
sinu juntu 'nsipultura  
ci sarò ricunuscenti.

## GIGGHIU D'AMURI

*(Quannu si fici zitu me' figghiu Vicenzu)*

Diu mi retti stu Gigghiu d'Amuri  
riccu di doti e di summa buntà,  
semu ricunuscenti a lu Signuri  
chi ni cuncessi sta felicità;  
stiornu si scigliu stu beddu ciuri  
di ciauru, culuri e qualità,  
e patri e matri appimu l'idea  
di metticci a lu pettu st'Orchidea.

A sti du' ciuri ci vurria abbirsari  
lu me' curuzzu comu casiria,  
pi quanu sempri li pozzu ciarari  
e nuddu n'havi haviri gilusia;  
speru chi Cristu mi ni fa' priari,  
la rimanenza di la vita mia;  
«Poi quannu voli Diu l'Onniputenti  
sutta lu sguardu so' moru cuntenti».

## LA ME' FAMA

Di la me' fama ni sognu antusiasta  
pi tuttu l'universu è manifesta,  
ormai mi fici granni e tantu basta  
ancora vecchiu dugnu a tutti 'nguesta,  
purquantu la surtazza mi cuntrasta  
scrivitilu tutti 'nta la testa:  
chi senza cumpanaggiu pani e pasta  
nna la me' casa si fa' puru festa.

Pirchè li me' figghioli tutti quanti  
pi gloria di Diu l'Onniputenti,  
ci nne' vicinu ci ni su' distanti  
però ittannu un friscu sulamenti  
non fiat viriti sull'istanti  
chi tutti ottu su' sempri presenti.

## LA ME' MALATIA

*(Il 6/1/1986 ammalato ho dovuto ricoverarmi  
all'Ospedale "Luigi Sacco" di Milano)*

Vuliti rittu chiddu chi passai?  
puru la panza mi spaccaru nnui,  
jò tannu dissi: Gugghermu chi fai?  
'nfacci la morti, nun scappi, nun fui?  
L'alma a Diu mi raccumannai,  
spiranza pi la vita unn'appi chiui,  
chiurivi l'occhi e m'abbannunai  
dicennu a Cristu, pinzatici vui.

Nun pozzu dillu quantu lagrimavi  
mancu jò stessu, chiù lu cumprinnivi;  
rivavi o puntu chiù nun parlavi  
a li me' figghi chianciri sintivi.  
Me' figghia mi dicia: papà chi havi?  
jò sennu mortu nun ci rispunnivi,  
«pi gloria di Diu risuscitavi  
e riturnavi arrè 'nmezzu li vivi».

E fazzu notti e ghjornu a ringraziari  
pa' grazia chi mi fici lu Signuri,  
pi mentri campu nun pozzu scurdari,  
li manu santi di ddu' prufissuri.  
Di notti mi vinia a visitari  
mi dumannava s'havea duluri,  
e chiangu chi nun pozzu ricambiari

la sua gentilizza e lu so' cori.  
Guaritu u novi marzu mi mannau,  
turnavi 'ncasa comu vosi Diu,  
ma ddu drenaggiu chi iddu lassau  
doppu quattru jorna si chiuriu;  
me' ennaru o spitali mi purtau,  
precisamenti a Clinica di Sciu;  
a carni viva la panza spaccau,  
e comu un limuni la sprimiu.

Ora tutta la genti Pacicota  
virennumi pi strata caminari,  
dici: vossia è chiddu chi na vota  
mancu n'acchetta lu putia ascari?  
jò ci rispunnu cu la lingua asciota,  
ci dicu, chi ni duvemu rassignari;  
l'haviti vistu firriari na' rota?  
gira un pizzuddu, s'arriva a firmari.

Lu stessu è l'omu, drittu o riversu  
nun stà a iddu chiddu ch'avi a fari,  
pinzati sulamenti chi iddu stessu,  
mancu li passi soi po' distinari.  
C'è cu cumanna tuttu l'universu,  
all'insaputa ti farà cripari;  
lu to' prugettu 'nfunmu si nni và,  
e t'ha piegari a la so' volontà.

Pi ora basta ccà, mittemu puntu  
nun vogghiu lu discursu spillungari,  
mi piaci chi jò stessu vi lu cuntù,  
pi chissu vogghiu a Cristu ringraziari;  
siddu caminu a stentu nun m'affruntu,  
cu havi senza po' cunsidirari,  
chiddu chi soffru unnè capricciu miu,  
ma mi rassegnu a comu voli Diu.

## NOZZI D'ARGENTU

*(Lu 4 Aprili 1962 ficimu 25 anni di matrimoniu)*

Vintincinq'anni già sunnu passati  
di dda jurnata di filicità,  
di tanti parintuzzi accumpagnati  
dui urfaneddi privi di papà,  
fomu a la cattidrali priisintati  
'nfacci l'altari di so' Santità;  
e tra sospiri e lagrimi ittati  
aggrancicuni semu junti ccà.

Vintincinq'anni d'affanni e di stenti,  
chi distrureru la me' giuvintù,  
cu pani picca, cumpanaggiu nenti  
e travagghiari sempri a tù pi tù;  
sconosciu jocu e li divirtimenti  
zappa e trappitu lu me' spassu fu;  
però ni fici n'acquistu eccellenti,  
a cinquant'anni appena, un servu chiù.

Chi pozzu diri munnazzu spurcuni,  
di la me' picciuttanza chi passai?  
Quantu lignati abbuscai ammucciuni,  
ma un passu 'ndietru nun lu fici mai;  
e cu trappitu, cu runca e zappuni,  
ottu figghioli mi li sustintai;  
e ora vecchiu munnu lazzaruni,  
nun pozzu, e divu sbattiri chiossai.

Oggi vintinq'anni su' cumpiuti  
e li me' figghi su' tutti priati  
e nui vicchiareddi cumpiaciuti  
riremu cu li lagrimi affacciati;  
ottu figghioli, natri se' niputi,  
tutti a la me' tavula assittati;  
brindanu tutti a la nostra saluti  
cu acqua frisca e favuzzi calciati.

## LA LUSINGA DI SAN PETRU

Sta notti fici un sonnu eccellenti  
e vogghiu cunfirallu a tutti quanti,  
a li me' figghi, a tutti li parenti,  
amici di vicinu e di distanti;  
quannu jò moru tinitilu a menti,  
nun vogghiu né parrinu né chirlandi,  
mi dissi 'nsonnu: Diu l'Onnipotenti  
pirchè ti fingi d'essiri gnuranti.

Ristavi 'nfacci d'iddu tisu tisu  
mentri chiangia pi la cummuzioni;  
puru si qualchi vota v'haju offisu,  
lu fici sempri pi dispirazioni.  
San Petru, chi a la porta stava misu,  
doppu chi s'attintau la discussioni,  
grapi la porta di lu Paradisu  
m'aspetta poi a la risurrizioni.

Mi dissi tu vinisti giustu a casu,  
ccà 'mparadisu un Pueta sirvia,  
e ghjò cu San Giovanni e San Tummasu,  
fomu mannati tutti di giuria.  
Però quannu arrivamu a lu parnasu,  
tutti i pueta n'assignaru a tia,  
doppu chi mori e si risuscitatu  
cca trovi sempri lu postu sarvatu.

E pirsuasu di sta me' ntinzioni  
pi ssa lusinga già sugnu dicisu,  
e staju notti e ghjornu 'ncunfusioni  
chi nun ci posu dugnu sugnu misu.  
Aspettu sempri sta bedda occasioni,  
ma cu lu sapi, lu jornu precisu?  
Angili e Santi ficiru fusioni  
mi vonnu pi Pueta 'mparadisu.

## NOZZI D'ORU

Sti cinquantanni d'affettu e d'amuri  
sunnu lu fruttu di tanta buntà,  
ni fici suppartari li brutturi  
l'abusi fatti di l'umanità;  
semu ricunuscenti a lu Signuri,  
chi ni cuncessi sta filicità,  
chi tutti li me' figghi, frati e soru  
festeggianu li nostri Nozzi D'oru.

St'jornu cinquant'anni su' cumpiuti  
e versu Diu ristamu ubbligati,  
ancora accummiramu pi saluti  
facennu ancora certi spaccunati,  
quantu carizzi di figghi e niputi  
st'jornu specialmenti un ni parlati,  
cu tutti sti vasuna sti stringiuti  
semu comu du' ficu ammataccati.

Comu putemu scurdari stu jornu?  
cu tutti st'auguri chi si fannu,  
e cu tutti st'amici misi attornu,  
sti cammareri chi vennu e chi vannu;  
cu su' presenti, diri ci lu ponnu  
a li niputi chi doppu virrannu,  
chi sti du' cori, da Nonna e du Nonnu,  
ora si vonnu chiù beni ri tannu.

Pi stu gran preu, stu divirtimentu  
di cinquant'anni turnamu 'nnarreri  
quannu pinzamu nui dd'avvinimentu  
ni 'nfrusca a tutti dui lu pinzeri;  
e lu dicemu a lu sulì, a lu ventu  
a leta cera, maritu e muggheri:  
«facemu ancora cosi di picciotti  
comu si fussi arrè la prima notti».

## È UN MISTERU?

C'è cu dici chi c'è Diu  
e cecamenti teni firi,  
c'è cu dici nun ci criu  
comu un fissa si ni riri.

C'è cu è cun si ni cura  
comu un porcu a massaria,  
comu sceccu a mangiatura  
mangia, vivi e bistimia.

Nun ci arriva u sintimentu  
o nall'occhi unn'havi vista,  
chi pi fari stu frumentu,  
l'havi aviri un prugittista.

Lu viddanu lu simina  
poi cu è chi n'havi cura?  
una forza super divina  
vi l'assisti e lu matura.

Suli, celu, terra e mari,  
luna, acqua, venti e stiddi  
nun vinitimi a cuntari  
chi nasceru d'iddi e d'iddi?

Raggiunamu cu' puduri  
e scartamu lu babbu,  
si c'è statu un creaturi  
chissu è statu sulu Diu,

ma na pocu di scinziati  
chi nun sannu si su' vivi,  
nichi e grossi bummulati  
ogner'unu 'nventa e scrivi,

ed insistinu chi a l'omu,  
una scimmia lu fici,  
ma però nun sannu comu  
chisti poviri 'nfilici.

Ci vulissi dumannari  
a cu' è chi chissu rici,  
si sapissiru spiegari  
a la fimmina, cu a fici?

Di sicuru com'è loggicu,  
è sbagliata ss'opinioni,  
si l'omu era un'ibridu,  
nun facia ripruduzioni;

certu fussi cosa bella  
fussi un preu pi li mmriachi,  
siminassu rafanella,  
ricugghissu vastunachi,

siddu avissiru raggiuni  
tutti quanti li scinziati  
supra un'arvulu limuni,  
si cughissi ficattati?

Sia cristianu, Ebreu o Turcu  
v'ha rapitivi l'oricchi,  
siminannu granaturcu,  
chi mittissivu linticchi?

Di sicuru com'è logicu  
né 'Ngiapponi, né Abissinia,  
certu chi nudda nespula  
produci ficurinia.

Sia niputi, figghi o patri,  
vi putiti rassignari,  
nun è cosa pi vuiatri  
di sti cosi raggiunari.

Lu chiù spertu spacca zeru  
già la cosa è manifesta  
siddu è statu un gran misteru,  
un misteru sempri resta,

tutti quanti semu 'nfallu  
sia scinziati chi sapienti,  
stu misteru po' spiegarlu  
sulu Diu l'Onnipotenti.

## ALL'USCITA DU PANURAMA

Cu' lu me' cori letu e palpitanti  
pi stu gran preu, sti divirtimenti  
e quasi cu l'ucchiuzzi lagrimanti  
pi sta gran festa tantu cummuventi.  
Ora siti 'mpignati tutti quanti  
siddu lu Padr'Eternu l'accusenti;  
quannu facemu i nozzi di brillanti  
vi vogghiu puru ccà: tutti prisenti.

## A LA TARGA

Nun lu putemu mai diminticari  
stu gestu fattu d'affettu e d'amuri  
chi vosiru a niatri didicari  
sta targa chi ni retti tant'onuri.  
Nui putemu sulu ringraziari  
Sinnacu cunsigghieri e l'assissuri,  
ni la uffreru tutti quanti foru  
"comu rigalu di li nozzi d'oru".